

Nota Angulam
Criticum pri-
mum.

primæ, den Anzeiger des siebenden / Nachdem so schawen weiter / wenn des Mon-
den Grad auff die dritte Linea / so vom Mittel Cetro auff halbweg 8. Uhr Vormit-
tage zugehet / vñ dieselbe bedeut dir aber ein andern intercadentem oder zwischenfal-
lenden / darnach so schawen / zu welcher Zeit der Mond mit seinem Grad auff die gera-
de Lineam, so auß Orient von der 6 Stunde im Limbo, in Niedergang gehet / das
ist / auff den geraden Horizont in Auffgang falle / welches gemeinlich am 7. Tage
geschicht / vnd diesen Tag nennen wir Criticum, vnd die Lineam Angulam Criti-
cū primum; das ist / der Tag / da die Kranckheit wieder die Natur streitet / an welchem
Tage / wie sich ein Arzt gegen dem Krancken halten sol / wirdt sich ein verstendiger
Arzt wol darin zu schicken wissen / wie er der Kranckheit mit Hülff vnd Natur wieder
die Kranckheit begegnen sol / wenn aber der Mond mit seinem Grad auff gemeldter
Linea ein Planeten / oder etwann ein grossen Stern mit seinem eigen Punct / oder
mit dem Schein des Aspects findet / welcher der Kranckheit zu wieder ist / so vberwin-
det die Natur / vnd die Kranckheit gehet hinweg.

Ptolemæus.

Findet aber der Mon einen Stern oder Planet / der die Natur an ihm hat wie
die Kranckheit / so vberwindet die Kranckheit / vnd die Natur ligt vnden / dahero dann
der Krancke entweder stirbt / oder in schwerer Kranckheit felle / als Ptolemæus
proposit. 60. Centiloquij sagt / vnd das trifft zu / wann die Natur von keinen euf-
ferlichen Dingen verhindert wirdt / als da ist Zorn / Traurigkeit / Betrübnuß / Sor-
gen / Arzney / Essen vnd Trincken / oder die alten Weiber / so vmb den Krancken sindt /
mit ihrem Heulen / Weinen / Plappern / Leckerfuchlein oder andern / das die Natur
von ihrer Wirkung abzeugt / thun möchten / darumb ein Arzt / dieweil er nichts an-
ders ist / denn ein Knecht der Natur / sol eben auff die Natur achtung geben / als ein
Knecht auff seinen Herrn / vnd so er siehet was die Natur wieder die Kranckheit für-
nimbt / sol er da sein / vñ ihr schnell zu Hülff komen / daß die Natur treibet die Kranck-
heit hinweg / vnd nicht der Arzt / der Gelehrte Arzt mag aber der Natur wol helffen / als
wenn einer eine hitzige Kranckheit hat / welche von der Cholera wegen die Naturli-
che Ordnung vbertrifft / vnd findest zu der Zeit / da der Mondt auff gemeldter Linea
in Auffgang kompt ein Gestirn od ein Planet von der Natur des Mondes oder Ve-
neris, so vberwindet die Natur die Kranckheit / vnd wirdt der Krancke gesundt.

Nota.

Findest du aber ein Gestirn von der Natur Martis, oder der Sonnen / so vber-
windet die Kranckheit / vnd die Natur ligt vnden / darumb der Krancke (Gott wolle
ihne denn sonderlich behalten) schwerlich genesen mag / so aber ein Kranckheit von der
vbertrettunge des Bluts were / so ist das Gestirn Iovis böß / vnd das Gestirn Satur-
ni gut / ist dann die Kranckheit von der vbrigen Feuchtigkeit / so ist das Gestirn von
der Natur des Monden vnd Veneris böß / vnd das von der Natur Martis vnd der
Sonnen gut / vnd zum letzten / ist die Kranckheit von der Melancholia / so ist das Ge-
stirn Iovis gut / ist aber eine Kranckheit von gemischten Feuchtigkeiten / so habe auff
gemischtes Gestirn / diese Feuchtigkeit betreffende / acht / vnd gleich wie ich von diesem

Winckel